

dreas Paruta suffectus est : a Pontifice Maximus e Maximorum familia , ac Alduinus dicti ; qui cum postea ad Papotias vicum convenissent , complures dies re agitata , ea infecta discessere .

In Illyrico quoque tumultus exorti , qui a privatis inimicitiis in publicum erupere . Nam cum inter Reipublicæ subiectos ac finitimos Turcas dissidia exarsissent , a vulneribus ad cædes ventum esset , Turcæ aliquot a nostris male habiti ac interfecti fuissent ; gens ferox atque insolens , privatas publicis vindicare injuriis moliebatur : jamque in Jaderensem agrum depopulatura ferebatur . Quibus cognitis , Camillus Trivisanus , equitum præfectus , vir fortitudine atque militari experientia , cum in Pannonia dimicasset , clarus , ne quid nostri detrimenti acciperent , summopere nitebatur : cumque sexcentos partim pedites partim equites in ditiones Reipublicæ impetum facturos per exploratores Trivisanus cognovisset , obsistendum ratus , equitum multo minore numero in insidias pertrahere Turcas conatur : qui cum fastu ac incondito clamore more gentis irruerent , Trivisanus inopinantes a latere aggreditur . Improviso eventu perterriti terga vertunt : quinque ac triginta ex iis interfecti , e nostris nemine desiderato . Eo certamine finitimi omnes Turcæ commoti , arma capiunt , ad Boffinæ Bassam querelas deferunt , ut ex tenui scintilla brevi ingens exarsurum incendium videretur . His de rebus Senatus certior factus , Marco Antonio Venerio , Illyrici atque Epiri legato , mandat , cuncta ad Turcarum impetum sustinendum , subditosque tuendos comparet ; copias cum equestres tum pedestres in Reipublicæ finibus cogat ; neque ex iis nisi laceffitus pedem efferat , ne exinde turbandæ cum Turcarum Rege pacis occasiones exoriantur : si Turcæ Reipublicæ ditiones aggredi , atque in eas impetum facere velint , quacumque ratione fortiter atque alacriter obsistat . Ducenti e Croatia pedites adjecti , quatuor armata navigia mittuntur . Augustino Canalio , qui Venerio suffectus in provinciam iter habiturus erat , eadem injuncta sunt : atque ut nihil , quod ad dissidia sedanda attingeret , prætermitteretur , ad Venerium datæ literæ , quibus statim ad Boffinæ præfectum nuncium cum literis mittere jubetur .